

劉賓客文集卷第七

論下



辯易九六論

與董生言易



辯易九六論

乾之爻皆九而坤六何也世之儒曰吾聞諸孔穎達云陽尊得兼乎陰陰不得兼乎陽也它日子與董生言及易生曰吾聞諸畢中和云舉老而稱也請徵諸揲著夫端策者一變而遇少與歸奇而為五再變而遇少與歸奇而為四三變如之是老陽之數分措于指間者十有三策焉其餘三十有六四四而運得九是已故易繫注云乾一爻三十六策也一變而遇多

與歸奇而為九再變而遇多與歸奇而為八三變如
之是老陰之數分措于指間者二十有五策焉其餘
二十有四四四而運得六是已故易繫注云坤一爻
二十四策也借如一變而遇少再變三變而遇多是
少陽之數分措于指間者二十有一策其餘二十有
八四四而運得七一變而遇多再變三變而遇少是
少陰之數分措于指間者十有七策其餘三十有二
四四而運得八故九與六為老老為變爻七與八為
少少為定位故曰舉老而稱亦曰尚變而稱且夫筮
為乾者常遇七斯乾矣常遇九斯得坤矣筮為坤者

常遇八斯坤矣常遇六斯得乾矣在左氏國語有之
晉公子親筮之曰尚有晉國得貞屯悔豫皆八八非
變爻故不曰有所之按次二世而為屯屯之六二為
世爻震一世而為豫豫之初六為世爻屯之二豫之
初皆少陰不變斯非八乎卦由老數而舉曰六筮由
著數故斥曰八在左氏春秋傳有之曰穆姜薨于東
宮始往而筮之遇艮之八史曰是謂艮之隨夫艮_艮
_上之隨_震_下唯二不動斯遇八也餘五位皆九
六故反焉筮法以少為卦主變者五而定者一故以
八為占艮之六二曰艮其腓不拯其隨其心不快史

以為東宮實幽也遇此為不利故從變爻而占苟以說于姜也何則卦以少為主若定者五而變者一即宜曰之某卦觀之否師之臨類是也變與定均即決以內外今變者五定者一宜從少占懼不吉而更之故曰是謂艮之隨是謂之云者苟以說也故穆姜終死于東宮與艮會耳而杜元凱於此注以為雜用三易故有遇八之云非臻極之理也劉子曰余與董生言九六之義信與理會為不誣矣余又於左氏二書參焉若合形影然而世人往往攘臂于其間曰生之名孰與穎達著邪而材孰與元凱賢邪歷載曠日未嘗有聞人明是說者雖余憤然用口舌爭特貌從者什一二焉嗟乎由數立文所如皆合昭昭乎若觀三辰其不晦也如此然猶貴聽而賤視斷斷五反五然莫可更也矧無形之理不可見之道邪余獨悲而志之以俟夫後覺初董生言本畢中和中和本其師師之學本一行云

第一指餘一益三餘二益二第二指餘一益二餘二益一第三指與第二指同

右揲著數掛從下起指亦自下始第一指法地故益成

第一指遇一益三并掛一為五遇三遇二並謂之少與一同第二指遇一益二并掛一為四第三指遇一益二并掛一為四

右三指俱遇少通計十三策其餘三十六策四

四運之得九為老陽故易繫云乾之策二百一十有六注云陽爻九一爻三十六策六爻二百一十有六

第一指遇四益四與掛一為九第二指遇四益三與掛一為八遇三亦同第三指遇四益三與掛一為八遇三亦同

右三指俱遇多通計二十五策其餘二十四策四四運之得六為老陰故易繫云坤之策百四十有四謂陰爻六一爻二十四策六爻一百四十有四

第一指遇一益三并掛一為五第二指遇四益三并掛一為八第三指遇四益三并掛一為八

右初指少第二第三指多以少為主通計二十一策其餘二十八策四四運之得七為少陽

第一指遇四益四并掛一為九第二指遇一益二并掛一為四第三指遇一益二并掛一為四

右初指多第二第三少以多為主通計一十七策其餘三十二策四四而運得八為少陰

第一指遇少謂一二也並止於五第二指遇多謂三四也並止於八第三指又遇少謂一二也並止於四

右初指少第二指多第三指又少以多為主通計一十七策其餘三十二策四四而運得八為少陰

第一指遇多謂四也止於九第二指又遇多謂三也止於八第三指遇少謂一二也止於四

右初指第二指並多第三指獨少以少為主通

計二十一策其餘二十八策四四運之得七為少陽

第一指遇少止於五

第二指又遇少止於四

第三指遇多止於八

右初指二指並少三指獨多以多為主通計一

十七策其餘三十二策四四運之得八為少陰

穆姜薨于東宮始往而筮之遇艮之八史曰是謂艮

之隨夫艮艮上艮下之隨震下兌上唯六二爻不動餘五

畫變變者遇九六也二不動者遇八也

晉公子親筮之曰尚有晉國得貞屯悔豫皆八夫屯

震下坎上六位畫不遇六九故不動既無所之即以世

爻為占按屯是坎宮二世卦故以一為占則遇八夫

豫坤下震上是震宮一世卦以初六為占亦遇八韋昭

於此注云內曰貞外曰悔震下坎上為屯坤下震上

為豫言得此兩卦震在屯為貞在豫為悔八謂震兩

陰爻在貞在悔皆不動所以筮史占之謂閉而不通

者爻無為也乾之策二百一十有六謂陽爻九一爻

當二百一十六言三坤之策一百四十有四謂陰爻

二十六者舉老陽也二十四策六爻當百四十有

凡三百有六十當蕃之曰二篇之策萬有一千五

百二十當萬物之數六十四卦都三百六十四爻陰

陽相半各一百九十二爻
陽爻一爻三十六策合為六千九百一十二陰爻一
爻二十四策合為四千六百八

右六九之數

一行大衍論云三變皆剛太陽之象也三變皆柔太
陰之象也一剛二柔少陽之象也一柔二剛少陰之
象也少陽之剛有始有牡有究少陰之柔有始有牡
有究因綜四象之變而成八象焉八象之位而八卦
之本列矣注云太陽始動施于太陰而生震象之七
謂少陽之七再動于牡而生坎象之七
謂再索而三
為震初九再動于牡而生坎象之七
謂再索而三

動于究而生艮象之七
謂三索而太陰始動施于太

陽而生巽象之八
謂少陰之八再動于牡而生離象

之八
謂再索而三動于究而生兌象之八
謂三索而

是以九六七八分為八象

右大衍論

國語又云董因迎公于河公問焉曰吾其濟乎對曰
臣筮之得泰之八曰是謂天地配亨小往大來今及
之矣何不濟之有韋昭云泰三至五震象為侯陰爻
不動其數皆八與貞也悔豫義同劉子曰昭此說用
互體有震按董因之言天地配亨是六五帝乙歸妹

中山集 卷七
以祉元吉之爻夫泰乾坤體全內外位正內為身外
為事卜得國事也以外卦為占六五居尊位故統論
卦下辭曰小往大來爻遇歸妹故曰天地配亨何必
取互體也

右與董生言易

劉賓客文集卷第七

劉賓客文集卷第八 記上

天平軍節度使廳壁記

汴州刺史廳壁記

國學新修五經壁記

汴州鄭門新亭記

鄭州刺史東廳壁記

管城新驛記

和州刺史廳壁記

山南西道節度使廳壁記

山南西道新修驛路記

天平軍節度使廳壁記

元和十四年春二月王師平河南負固之地十有二
州憲宗視地圖戶版俾參其地三月有詔其以曹濮
隸鄆為一隅按部三郡統兵三萬乃新其軍錫號天

平蓋承天威以平暴悖志動揚休在稱為雄新邦始
徠汚俗猶用朝廷革之以漸故命功臣或辨吏以帥
焉大和三年冬天平監軍使以故侯病聞上方注意
治本乃以牙璋玉節鼎右僕射官稱賜東都留守令
狐公曰予擇文武惟汝兼前年鎮汴州有顯庸往年
弼憲宗有素貴徒得君重剛吾四支公西拜稽首登
車有耀不踰旬抵治所夾清河而域之惟鄆州在春
秋為須句之國涉漢為濟東蓋禹貢兗州之域宣精
在上奎為文宿畫野在下魯為儒鄉故其人知書風
俗信厚天寶末大憝起於幽都虜將因兵鋒取其地

右勇左德積六十年公之來思如古醫之治劇病宣
洩順養氣還神復大凡抗詔條國式於身以先之示
菲約以裕人信賞罰以格物物力日完人風自移涉
月報政踰年鼎治牙門之容暨暨而恭壘門之容乞
乞而和里中之容闐闐而遂勞者以安去者以歸分
星不搖田祖降福凡革前非罷供第無名錢歲鉅萬
菽粟如之錦繒且千兩去苛法急徵毀家償租之令
故流庸自占四萬室衆無吁咨和氣乃來三田仍稔
草木咸瑞豈偶爾哉初斯堂西墉有刺史記而元戎
雄尊之位虛其左方豈有待邪公命愚志之俾來者

仰公知變風之自大和五年夏四月二十六日記

汴州刺史廳壁記

本朝以浚儀為汴州刺史治所自隋醜新渠吸黃河而東行州含其樞為天下劇內屏王室東雄諸侯居無事時常帶廉察使兵興已還益以節旄用人得否繫國輕重長慶四年詔書命河南尹敦煌令狐公來莅來刺錫之介圭使印兵符汴人交賀肴醪騰貴惟是邦始都于魏惠王始郡于宇文周星躔回環天駟垂光地為四戰故其俗右武人具五都故其氣習豪公自為宰相時已熟四方之利病凡所戾止參然前知既視事三日挹群吏與之言曰吾食止圭田吾用止公入凡它給過制傷廉澆潔者悉罷之壹歸乎公歲凡曲防苛禁不情乖體者悉刻之壹出乎令典凡關征船筭奪時專利者悉更之壹遵乎詔條然後刑麗事而詳賞以時而均興學以勸執示寬以化勇居數月而汴州人恂恂然無復故態明年大成議者若曰奕奕浚都國之咽喉咀清燕和旁暢四支東夏黠馬由我以肥是浚之治非所澤于所履而已初公七代祖在隋為納言大業中持節居此亦號刺史距今餘二百年公實能似既拜闕發魚書合左右契由阡

階躋遐踵前武歆然如聞其馨香肅然如覩其形容
信乎君子之澤遠而有光輝也它日命遊梁客志之
書于廳事謹按前賢之在此堂者張平原首之陸氏
撰節度使記揭于東壁詳矣今公命為刺史記書于
右端謹月而日之以公為冠大和元年夏五月某日
記

國學新修五經壁本記

初大曆中名儒張參為國子司業始定五經書于論
堂東西廂之壁辯齊魯之音取其宜考古今之文取
其正繇是諸生之師心曲學偏聽臆說咸束之而歸
于大同揭揭高懸積六十歲崩剝污蟻泮然不鮮今
天子尚文章尊典籍於苑囿不加尺椽而成均以治
學上言遽賜千萬時祭酒皞實尸之博士公肅實佐
之國庠重嚴過者必式遂以羨羸再新壁書懲前土
塗不克以壽乃析堅木負墉而比之其制如版牘而
高廣其平如粉澤而潔滑背施陰關使衆如一附離
之際無迹而尋堂皇靚深兩廡相照申命國子能通
法書者分章揆日遜其業而繕寫焉筆削既成讐校
既精白黑彬斑瞭然飛動以蒙來求煥若星辰以敬
來趨肅如神明以疑來質決若著蔡由京師而風天

中山集 卷八
下覃及九譯咸知宗師非止服逢掖者鑽仰而已於
是學官某等暨生徒凡四百二十有八人請金石刻
且歌之曰

我有學宇既傾而成之我有壁經既昧而明之孰規
摹之孰發揮之祭酒維齊博士維韋俾我學徒弦歌
以時切切祁祁不敖不嬉庶乎道人來采我詩時余
為禮部郎凡瞽宗之事得以關決故書之以移史官
宜附于藝文云

汴州鄭門新亭記

亭于西門尊闕路也實相公以心規群僚以辭叶而
百工以樂成斧斤無聲丹素有嚴主人肅容落以金
石走鄭之門欽為右垣黃河一支滉漾北軒前瞻東
顧薨動軌直含景生姿遡空欲翔汴城具八方之人
殊形詭言而耳目一說初公來臨擁節及門馭吏曰
此鄭州門公心非之若曰野哉居無何即舊號而更
之曰鄭門故事王人大僚之去來元侯前驅翊門而
旋率立馬塵空中挹策為禮公心不然之乃下亭令
于執事按亭東西函丈者三之有奇而南北五之有
贏樂縣宴豆前後以位棊闔對明珥掀順時修梁衡
建中虛上荷圓脊方廉高卑中經簾鑪茵帟文櫨睨

榻儲以應猝周用而宜乃命尹閤視亭長抱關視掌
固啓閉拚除是謹是攷錫命賜胙勞迎贈餞我當躬
行汝先汝蠲挾膳提醪生芻縞衣我寮展事靡問文
武汝唯汝從凡入而修容凡出而修輟褻嚴威儀勿
籍勿訶繇是貴人稱諸朝群吏詠於家行者誇于道
與人同其安者人人驛其聲而吟之始乎譏譏而成
乎麗鴻欲無文字不可也公遂條白其所以然遠命
學古者書之公姓令狐氏以文章典內外書命以暮
明登左右相以飛語策免以思材復徵自有浚師無
如今治文武兩熾其古之大臣歟

鄭州刺史東廳壁記

古諸侯之居公私皆曰寢其它室曰便坐今凡視事
之所皆曰廳其它室以辨方為稱今年鄭州刺史楊
君作東廳既成而落之且以書抵余為記按國章以
甲乙第方域大凡環天子之居為雄州鄭實邇王畿
故望雄視其版多貴人且當大達故務劇君侯始來
三日司稅掾舉七縣董租之吏累百君曰此百媵也
悉罷之用戶符而輸入益辦司貢掾舉梨林之征請
戶曉君曰盡弛之勿籍用平賈而果益精里無吏迹
民去痼疾授牘占租如臨詛盟土毛人力日夕相長

故周歲而完焉比年而愈肥雖軍興餽輓旁午大將
牙旗往復相踵而里中清夷雞犬音和人既寧而物
有餘政既成而日多暇園視舊宇宜有以更之且書
得時亦以謹始因列名氏授受月而日之庶乎繼踐
于茲者知貫珠之首其山望澤浸土風眩俗與前賢
之耿光備于正位有天寶中詞人杜顓之文在大和
四年某月日

管城新驛記

大和二年閏三月滎陽守歸厚上言臣治所直天下
大達肘武牢而咽東夏誰何宜謹啓閉宜度先是驛
于城中驛遽不時四門牡鍵通夕弗禁請更于外隧
永永便安制曰可守臣奉詔無徵命無奪時糜羨財
募游手逮八月既望新驛成鄭人胥說琢石而紀曰
在兌之方面玄負陽門銜周道牆蔭行栗境勝于外
也遠購名材旁延世工暨塗宣哲銳斲剛滑術精于
內也遠廬有甲乙牀帳有冬夏庭容牙節廡卧囊橐
示禮而不恩也內庖外廡高倉邃庫積薪就陽峙芻
就燥有素而不愆也主吏有第役夫有區師行者有
饗亭孥行者有別邸周以高墉乃樓其門勞迎展蠲
潔之敬餞別起登臨之思溱洧波瀾嵩丘雲煙四時

萬象來貺于我走轂奔蹄遄征急宣入而忘勞出必
屢顧其傳舍之尤乎太守姓楊氏字貞一華陰弘農
人鄭為雄州非聞人大吏不得在其選夫驛之宜選
于外也前此二千石嘗言之而重改作若貞一可謂
果於從政而決行其言惜乎未施於大也

和州刺史廳壁記

歷陽古揚州之邑於天文直南斗魁下在春秋實句
吳之封後為楚所取秦并天下以隸九江而六為九
江治所晉平吳復隸淮南至永興初自析為郡益之
以烏江宋臺建目為南豫州又益之以龍亢梁之亡
北齊圖霸功擁貞陽侯以歸王僧辯來迎會于茲地
二國和協故更名和州陳隋間無所革國朝因隋武
德中更龍亢為含山初開元詔書以口筭第郡縣為
三品是為下州元和中復命有司參校之遂進品第
一按見戶萬八千有奇輸緡錢十六萬歲貢織紵二
筐吳牛蘇二鈞糝鱣九甕茅蒐七千兩鎮曰梁山浸
曰歷湖田藝四穀黍全六擾廬有旨酒庖有腴魚神
仙故事在郊在藪玄元有臺彭鏗有洞名山曰雞籠
名塢曰濡湏異有血閩祥有沸井城高而堅亞父所
營州師五百環峙于東南瀕江劃中流為水疆揭旗

中山集 卷八
樹蕪十有六成自孫權距陳出入六代常為宿兵之地多以材能人處之本朝混一號為善部然用人差輕非復曩時之比也始余以尚書郎得譴刺連山今也由巴東來牧考前二邦之籍與版圖纔什五六而地征三之究其所從來生植有本女工尚完堅一經一緯無文章交錯之奇男夫尚墾闢功苦戀本無即山近鹽之逸市無嗤眩工無彫彤無游人異物以遷其志副徵令者率非外求凡百為一出於農桑故也繇是而言瘠天下者其在多巧乎寶曆元年六月二十一日刺史中山劉某記

山南西道節度使廳壁記

文皇帝初元始畫天下為十道古荆梁之地舉曰山南厥後析為東西天漢之邦實居右部按梁州為都督治所領十有五州縣道帶蠻夷山川扼隴蜀故二千石有採訪防禦之名兵興多故其任益重澄清節鉞二柄兼委建中末德宗南巡狩偃翠華而徘徊蕭勺之音洽于巴漢戡難清宮六龍言旋廼下詔復除征繇升州為府等威班制與歧益同地既尊大用人隨異故自興元至大和五十年間以勲庸佩相印者三以暮明歷真相者九由台席授鉞未幾復入相者

再焉磊落震耀冠于天下去年夏四月今丞相趙郡公徵還秦階遂命左僕射燉煌公往踐其武鄉之也相及公而十焉初公自河陽節度使入操國柄其後鎮宣武以禮悛獷悍治天平以清去掎克居大鹵以仁蘇荐饑今來是都躡二三大君子之蜀道同氣協無所改更如鼓和琴布指成韻羌夷砥平旱麓發生人無左言樂有夏聲俗既富庶居多閒暇園視府局素闕者補之先是公堂嘗為行殿人不敢斥別營侯居應門有閑檠戟未具公乃條白上言詔下有司可其奏軍門肅清方有眉目趨而入者聳然生敬焉惟梁山國也其節用虎出揚其威入貯宜潔舊處仄陋黷其雄稜公遂分宅之別齋且據便地署曰節室卜剛日乃遷焉敬君命而壹民心軍中增氣而知禮戟衣既垂師節既嚴流眄屋壁見前修之名氏列于座右第以梁州刺史鼎興元尹記與今稱謂不合因發函進牘于不佞且曰我已飾東壁以新志累子於是按南梁故事起自始登齋壇之後為記云時開成二年歲在丁巳春二月某日記

山南西道新修驛路記

開成四年梁州牧缺上玩其印凝旒深思曰伊爾卿

族歸氏以文儒再世居喉舌今天官貳卿融能嗣其
耿光嘗自內庭歷南臺尹轂下政事以試可為元侯
乃付印綬進秩大宗伯兼御史大夫玉節獸符鎮于
媯墟公拜手稽首曰臣融敢揚王休于天漢之域既
蒞止咨于群執事求急病者先之咸曰華陽黑水昔
稱醜地近者嘗為王所百態丕變人風邑屋與山水
俱一都之會目為善部矣唯驛遽之途歎危隘東其
醜尚存使如周道在公願指耳於是因年有秋因府
無事軍逸農隙人思賈餘乃懸壑山刊木之傭募其
力揆鑿鑿撞秘之用庀其工具昇輦畚鍤之器膺其
要礮鼓以程之糗醪以犒之說使之令既下奮行之
徒全集我之提封踞右扶風觸劔閣千一百里自散
關抵褒城次舍十有五牙門將賈黯董之自褒而南
逾利州至于劔門次舍十有七同節度副使石文頴
董之兩將受命分曹星馳並山當巉頑石萬狀坳者
埕者兀者銛者磊落傾欹波翻獸躡熾炭以烘之嚴
醢以沃之潰為埃煤一篲可埽棧閣盤虛下臨巖呀
層崖峭絕杳木亘鐵因而廣之限以鉤欄狹逕深陁
銜尾相接從而拓之方駕從容急宣之騎宵夜不惑
邠曲稜層一朝垣夷興役得時國人不知繇是駛行

中山集 卷八
者忘其勞吉行者徐其驅孥行者家以安貨行者肩
不病徒行者足不壘乘行者蹄可刈公談私詠溢于
人聽伊彼金其牛而誘之以利曷若我子其民而來
之以義乎既訖役南梁人書事于牘請紀之以附于
史官地里志

劉賓客文集卷第八

劉賓客文集卷第九記下

夔州刺史廳壁記

連州刺史廳壁記

機汲記

洗心亭記

復荆門縣記

夔州刺史廳壁記

夔在春秋為子國楚并為楚九縣之一秦為魚復漢
為固陵蜀為巴東梁為信州初城于瀼西後周大總
管龍門公拓王述登白帝歎曰此奇勢可居遂移府
于今治所是歲建德五年隋初楊素以越公領總管
又張大之唐興武德二年詔書其以信州為夔州七

中山集 卷九
年增名都督府督黔巫一十九郡開元中猶領七州
天寶初罷州置郡號雲安至德二年命嗣道王鍊為
太守賜之旌節統硤中五郡軍事乾元初復為州偃
節于有司第以防禦使為稱尋罷以支郡隸江陵按
版圖方輸不足當通邑而今秩與上郡齒特以帶蠻
夷故也故相國安陽公乾曜嘗參軍事修圖經言風
俗甚備今以郡國更名之所以然著于壁云凡名殊
必以國事建必以年謹始也長慶二年五月一日刺
史中山劉某記

連州刺史廳壁記

此郡於天文與荊州同星分田壤制與番禺相犬牙
觀民風與長沙同祖習故嘗隸三府中而別合乃今
最久而安得人統也按宋高祖世始析柳之桂陽為
小桂郡後以州統縣更名如今其制誼也郡從嶺州
從山而縣從其郡邑東之望曰順山由順以降無名
而相歆者以萬數回環鬱遶迭高爭秀西北朝拱于
九疑城下之浸曰湟水由湟之外支流而合輸以百
數淪漣汨滴擘山為渠東南入于海山秀而高靈液
滲漉故石鍾乳為天下甲歲貢三百銖原鮮而臚卉
物柔澤故紵蕉為三服貴歲貢十笥林富桂檜土宜

陶旄故侯居以壯聞石侔琅玕水孕金碧故境物以
麗聞環峯密林激清儲陰海風毆溫交戰不勝觸石
轉柯化為涼颼城壓赭岡踞高負陽土伯噓濕抵堅
而散襲山逗谷化為鮮雲故罕罹嘔泄之患亟有華
皓之齒信荒服之善部而炎裔之涼墟也永貞元年
余始以尚書外郎坐黨累出補茲郡居無何吏議以
是遷也不足庚其責故道貶為朗州司馬後十年詔
書徵還抵京師俄復前命佩故印綬而南曩之騎竹
馬北向相僖者咸仕郡縣巾鞞來迎下車之日私言
且笑既視事得前二千石名姓于壁端宰臣王駿偉
卿劉冕儒官嚴士元聞人韓泰僉拜焉或久於其治
功利存乎人民或不之厥官翹顛載于歌謠余不佞
從群公之後肇武德距于今凡五十有七人所舉者
四君子猶振裘之於領袖焉元和十一年七月二十
四日刺史中山劉某記

機汲記

瀕江之俗不飲於鑿而皆飲之流予謫居之明年主
人授館于百雉之內江水汙汙周墉間之一旦有工
爰來思以技自賈且曰觀今之室廬及江之涯間不
容畝顧積塊峙焉而前耳請用機以汲俾轟然之狀

莫我遏已予方異其說且命之飭力焉工也儲思環
視相面勢而經營之由是比竹以為畚寘于流中中
植數尺之臬輦石以壯其趾如建標焉索絢以為緼
縻于標垂上屬數仞之端亘空以峻其勢如張弦焉
鍛鐵為器外廉如鼎耳內鍵如樂鼓牝牡相函轉於
兩端走于索上且受汲具及泉而修綆下縋盈器而
圓軸上引其往有建瓴之駛其來有推轂之易瓶緇
不羸如搏而升枝長瀾出高岸拂林杪踰峻防剗蟠
木以承澍貫修筠以達脉走下潺潺聲寒空中通洞
環折唯用所在周除而沃盥以蠲入爨而錡釜以盈
餽餼之餘移用于湯沐涑澣之末泄注于圃畦雖漢
湧于庭莫尚其霑洽也昔予嘗登陴擱然念懸流之
莫可遽挹方勉保庸督臧獲軒而挈之至于裂肩龜
手然猶家人視水如酒醪之貴今也一任人之智又
從而信之機發于寘寘而形於用物浩漾東流赴海
為期幹而遷焉逐我頤指鄉之所謂阻且艱者莫能
高其高而深其深也觀夫流水之應物植木之善建
繩以柔而有立金以剛而無固軸卷而能舒竹圓而
能通合而同功斯所以然也今之工咸盜其古先工
之遺法故能成之不能知所以為我也智盡于一端

功止于一名而已噫彼經始者其取諸小過歟

洗心亭記

天下聞寺數十輩而吉祥尤章章躡名山俯大江荆吳雲水交錯如繡始予以不到為恨今方弭所恨而充所望焉既周覽讚嘆於竹石間最竒處得新亭形焉如巧人畫鼇背上物即之四顧遠邇細大漉然陳乎前引人目去求瞬不得徵其經始曰僧義然孺侶為工即山求材槃高孕虛萬景全來詞人處之思出常格禪子處之遇境而寂憂人處之百慮冰息鳥思猿清繞梁歷椽月來松間彫鏤軒墀石列筍簾藤蟠蛟螭修竹萬竿夏含涼颺斯亭之實錄云爾然上人舉如意挹我曰既志之盍名之以行乎遠夫余始以是亭園視無不適始適乎目而方寸為清故名洗心長慶四年九月二十三日劉某記

復荆門縣記

直故郢北走之道其聚邑曰荆門揭起重關殿于樂都名視縣內之制居殷形束之要故吏師重焉通外民之底貢會南藩之述職故賓禮蕃焉其肇允經營實王孫昌夔居荆以表之命行名建而締構之弗暇無幾何有由勇爵而授赤社于茲者徼馳名於省齋

謂相沿為非智因請罷去其號發踐更以董之有司不能端究事本循空言而可其奏繇是分地征以歸它邑野之人有回遠之歎廢文吏而顯戍督行之旅有誰何之難是利不及下也黎民病之自馱而南斯為畫疆抵郡之路貫其七舍持瑞節而銜急宣之使蓋陰相交遂使服縵胡者備問俗之對執刀七者申餼牽之禮是敬之不及賓也君子病之如是幾二十歲距永貞元年江陵尹裴公政成上游德及矜人大建長利俾無遺害乃外濟群欲內張全摹周圍經制條白于狀昌言既從公議攸同志勞之徒樂用之工載大其門載高其墉徑術脉分闌間架空然後析便地以肥之建具官以司之糜羨財以償其力役汰冗食以資其秩稍田里不聞於徵令縣官無減於歲入越某月既成而落之官修其方人樂其居將迎犒飫之儀展廢置符繻之事舉戍夫有伍公吏有職由彙而分率無踰閑入其封者可以知教元和元年四海會同天子命公師長南宮三年公以介圭入覲途出斯邑邑人之華皓幼童咸湏于道周距躍而謠曰起我堙廢而完之徠我蕩析而安之昔室于墟風搖雨濡自公優柔邠閩盈兮昔飲于洿夏溷冬枯自公感

通臯沸生兮淑旂之華兮四牡之駢徯公之還兮觴
以祝之郤略踰躑百形一音公為駐錯衡而勞之有
以文從公者紀事于牘且曰民可懷也蓋命夫學舊
史之事以志焉公不得讓而從之走是以有授簡之
辱初公以縣之之便聞于上也禹錫方以郎位貼職
于計曹章下之日得以省事逮今以遷人獲宥于善
部工休之日得以踐履故於拜命無牢讓於傳信無
愧詞以為古之創物建庸宜于人民而得其時者則
必譌其事功為後代法雅有營謝美召伯也傳稱城
沂賢為教也賦水泉原隰之狀志慮事命日之規當
書而詠之細亦弗可畧也是用謹其本始而存乎篇
俾後之視今者知楚郊之令典云

武陵北亭記

郡北有短亭繇舊也亭孤其名地蔽其勝前此二千
石全然見之建言而莫踐去之日率遺恨焉七年冬
詔書以竹使符授尚書水曹外郎竇公常曰命爾為
武陵守莅止三月以碩畫佐元侯平裔夷降渠魁又
三月以順令率蒸民增水坊表火道是歲大穰明年
政成農緣畝以勇勸工執技以思賈因民之餘力乘
日之多暇乃顧其屬曰郊道有候亭示賓以不恩也

雖聞茲地韜美未發豈有待邪自吾之治于斯也購
徒庀材大起堙廢未嘗植私庭礮燕寢役必先公人
不余瑕調賦幸均矣城池幸完美而重浹辰之役掠
苟簡之間卒使勝躅冒沒猶璞而不攻懼換符之日
遠復齎恨無乃遺誚於來者乎言得其宜智愚同贊
於是撤故材以移用相便地而居要去凡木以顯珍
茂汰汚池以通淪漣自天而勝者列於騁望由我而
美者生於頤指箕張筵楹股引房櫳斧斤息響風物
異態大道出乎左藩澄湖浸乎前垠仙舟祖輶繇是
區處九月壬午工告休亭長受成赤車威遲于以落
之肅賓而入園視有適沈水北澳陽山南麓點焉遽
遽雄殿郊隅前軒舒陽朱檻環之舞衣回旋樂簾參
差北廡延陰外阿旁注芊眠清泚羅入洞戶初筵脩
平彫俎靜嘉林風天籟與金奏合亦既醉止州從事
舉白而言曰室成于私古有發焉矧成于公庸敢無
詞觀乎焚楣有嚴丹雘相宣象公之文律擘然而光
也望之弘深即之坦夷象公之酒德溫然而達也庭
芳萬本跗萼交映如公之家肥熾而昌也門闢戶闔
連機弛張似公之政經便而通也因高而基因下而
池躋其高可以廣吾視泳其清可以濯吾纓俯于達

惟行旅謳吟是采瞰于野惟稼穡艱難是知雲山多
狀昏旦異候百壺先韋之餞迎退食私辰之宴嬉觀
民風於嘯詠之際展宸戀於天雲之末動合于誼匪
唯寫憂公曰夫言之必可書者公言也從事不以私
視予余從而讓之是自還也其可乎迺授簡于放臣
俾書以示後後之思公者雖灌叢萋草尚勿翦拜矧
翬飛之革然石刻之隱然歟

劉賓客文集卷第九

劉賓客文集卷第十書

上杜司徒書

獻權舍人書

為京兆李尹荅于襄州第一書

為京兆李尹荅于襄州第二書

荅饒州元使君書

荅容州竇中丞書

荅柳子厚書

與柳子厚書

荅道州薛郎中論方書書

與刑部韓侍郎書

與道州薛郎中論書儀書

上杜司徒書

時元和元年

月日故吏守朗州司馬員外置同正員劉某謹齋沐

致誠命僕夫持書敢獻于司徒相公閣下昔稱韓非
善著書而說難孤憤尤為激切故司馬子長深悲之
為著于篇顯白其事夫以非之書可謂善言人情使
逢時遇合之士觀之固無以異於它書矣而獨深悲
之者豈非遭罹世故益感其言之至邪小人受性顯
蒙涉道未至末學見淺少年氣粗常謂盡誠可以絕
嫌猜狗公可以弭讒愬謂慎獨防微為近隘謂艱貞
用晦為廢忠芻狗已陳列舟徒識罟獲隨足悵然無
知事去凝想時時自笑然後知韓非之善說司馬子
長之深悲跡符理會于古相見雖欲勿悲可乎大凡

怕人之所以靈於庶類以其能群以勝物也烈士之
所以異於怕人以其伏節以死誼也然則交相喪者
世與道難合并者機與時是以有死誼之心而卒不
獲其所者世人悲之獲其所矣而一旦如不得終焉
者君子悲之世人之悲悲其不遇無成而虧故其感
也近君子之悲悲其不幸既得而喪故其感也深其
悲則同其所以為悲則異若小人者其不幸與間者
昧於藩身推致危地始以飛謗生釁終成公議抵刑
旬朔之間再投裔土外贖相公知人之鑑內貽慈親
非疾之憂常恐恩義兩乖家國同負寒心銷志以生

為慙雖欲瀝血以自明籲天以自訴適足來衆多之
誚豈復有特達見知者邪遂用詛盟於心不復自白
以內咎為弭謗之具以吞聲為窒隙之媒庶乎日月
至焉而是非乃辨會友人江陵法曹掾韓愈以不幸
相悲且曰相國扶風公之遇子也厚非獨余知之天
下之人皆知之矣余聞初子之橫為口語所中獨相
國深明之及不得已而退則為之流涕以訣又不得
已而譴則為之擇地以居求之於今難與侔矣抑余
又聞曩子之介于司徒府奉誠敬於山園上公亟稱
於人以為不懈于位今則有修儀以贊其詔相者有
備物以贊其容衛者七月禮畢一朝慶行誥言敷之
授以顯秩子獨足趾一跌而前勞併捐祝網之辰動
絳踈目可封之代乃為窮人斯常情之所悲矧知子
之厚者夫陪者思起必諱而求拯疾者思愈必呻而
求醫子宜諱於有力而呻於有術如何以箝口自絕
為智以甘心受誣為賢噤然自咎求知於默彼李斯
逐焉而為上卿鄒陽囚焉而為上客二子者豈默以
求知者邪若可訴而不言則陷於畏可言而不辯則
隣於怨畏與怨君子之所不處子其處之哉韓生之
言未及竟而小人不知感從中來始赧然以愧又缺

然以慄終悄然以悲悲斯歎歎斯憤憤必有泄故見乎詞敢聞左右投所閔也嗟夫人之至信者心目也天性者父子也不惑者聖賢也然而於竊鈇而知心目之可亂於掇蜂而知父子之可間於拾煤而知聖賢之可疑况乎道謝孔顏恩異天性是非之際愛惡相攻爭先利途虞相軋則釁起希合貴意雖無嫌而謗生魯酒致邯鄲之圍飛鳶生博者之禍伯仁之殺由偶對伯奢之寃以噐聲動罹險中皆出意表雖欲周防亦難曲施加以吠聲者多辨實者寡飛語一發臚言四馳萌芽始奮枝葉俄茂方謂語怪終成禍梯

嗚呼人必求知不能自達何投分效節有積塵之難何潛行愛弛有決防之易何將進之日必自見其可而後親何將退之時乃人言其否而遂棄良由邪人必微邪謀必陰陰則難明微則易信罔極大甚古今同途是以前修鑒其若此姑以推心取信不以循迹生嫌由是求忠臣於孝子求良婦於罵已食子盡節也推其忍可以疑心放麤違命也推其仁可以屬國若謂其孝於親未必能忠專於夫未必能貞忍於子未必能忍於其它仁於獸未必能仁於其類則是天下之人盡不可信而盡可誣固不然也凡人之行已

必恒於所安苟非狂易不能甚異小人自居門下僅
踰十年未嘗信宿而不侍坐率性所履固無遁逃言
行之間足見真態伏惟推心以明其迹追往以鑒于
今苟謂其嘗掩人以自售矣嘗近名以冒進矣嘗欺
謾於言說矣嘗沓貪於求取矣嘗狎比其瑣細矣嘗
媒孽其僚友矣嘗矯激以買直矣嘗詆譎以取容矣
嘗漏言於咨誅矣嘗敗務以簿書矣有一于此雖人
謂其賢我得而刑也豈止於棄乎苟或反是雖人謂
其盜我得而任也庸可而棄乎由是而言小人之善
否不在衆人所以受譴已還行及半歲當食而歎聞
絃尚驚不以衆人之善為是非唯以相公之意為衡
準自違間左右亟蒙簡書慰誨勤勤窮頓增感伏想
仁念必思有以拯之况禮道貴終人情尚舊嘗盡其
力必加以仁於犬馬之微有惟蓋之報顧異於是豈
無庶幾儻浮言可以事久而明衆嗤可以時久而息
弘我大信以祛群疑使熒熒微志無已矣之歎覲乎
異日得夷平民然後裹足西向謝恩有所復以塵纓
黻貌稱故吏於相門此言朝遂可以夕死何則復於
變者其義重拯於危者其感深睽而後合示終不可
睽也否而後泰示終不及否也獲寶於已喪得途於

既迷與夫平居不為艱故所激者其味異矣伏以大
君繼明元宰柄用鴻鈞播平分之氣懸象廓無私之
照渙汗大號與人惟新昭回汪濊旁下郡國投荒為
民者咸釋拳桔遂還里閭繫於稍食猶在羈絆伏讀
赦令許移近郊今武陵距京師贏二千者無幾小人
祖先壤樹在京索間瘠田可耕陋室未毀濡露增感
臨風永懷伏希閔其至誠而少加推恕命東曹補吏
置籍於滎陽伍中得奉安輿而西拜先人松楸誓當
齋志沒齒盡力於井臼之間斯遂心之願也如或官
謗未塞私欲未從雖為裔民乃有善地則北距澧浦
資宿春而可行無道途之勤蠲僕賃之費重以鎮南
用和輔理扇仁風於上游霽嚴施惠得以自遂斯便
家之願也伏惟降意詳察擇可行者處之乞恩於指
顧之間為惠有生成之重雖百穀之仰膏雨豈喻其
急焉嗟哉小生仕逢聖日豈曰不辰知有相居豈曰
不遇而乘運鍾否俾躬罹災同生無手足之助終歲
有病貧之厄孰不求達而獨招嫌孰不求安而獨乘
次賦命如此雖悔可追湘沅之濱寒暑一候陽鴈纒
到華言罕聞猿哀鳥思啁啾響異莫夜之後併來愁
腸懷鄉倦越吟之苦舉目多似人之喜俯視遺體仰

安高堂悲愁惴慄常集方寸盡意之具固不在言身
遠與寡捨茲何託是以因言以見意恃舊以求哀敢
希末光下燭幽蟄孤志多感重恩難忘顧瞻門館慙
戀交會伏紙流涕不知所云禹錫惶悚再拜

獻權舍人書

禹錫在兒童時已蒙見器終荷薦寵始見知名衆之
指目忝閣下門客懼無以報稱故厚自淬琢靡遺分
陰乃今道未施於人所蓄者志見志之具匪文謂何
是用顛顛懇懇於其間思有所寓非篤好其章句沈
溺於浮華時態衆尚病未能也故拙於用譽直繩朗
鑒樂所趨也故銳於求益今謹錄近所論撰凡十數
篇蘄端較是非敢關於左右猶夫曠朴納於容範嘗
聞昔宋廣平之沈下僚也蘇公味道時為繡衣直指
使者廣平投以梅花賦蘇盛稱之自是方列于聞人
之目是知英賢卓犖可外文字然猶用片言借說於
先達之口席其勢而後驥首當時矧碌碌者疇能自
異今閣下之名之位過於蘇公之曩日而鄙生所賦
或鉅於梅花則沈泥干霄懸在指顧間其詞汰而喻
僭誠黷禮也繫游藩之久覲尚舊而霽嚴禹錫惶悚
再拜

為京兆李尹荅于襄州第一書

閣下以大墓世在三原而去河南益遠尚繫於數百年之外於義不安遂奮然移群從率先行古占數為京兆人且命使者修敬於鄙薄缺然不敢當此之重洪惟閣下世雄朔易四姓之冠其宗勳有八柱之貴其碩德有三老之重因都入雒錫之土田自生齒已上列于侯籍與夫其先嘗為編戶民者大殊謹按永徽格貫在兩都者無害為本部官蓋神州赤縣尊有所厭非它土之比實待罪輦轂下閣下宣風江漢為諸侯師介圭入覲必參大政其展禮措事宜為群倫所觀非據之榮赧然汗下不宣實再拜

第二書

實白前辱閣下書厚自枉屈執州人之禮兼示移群從書明所以去河南從京兆為望之旨於古儀為得然而通行之自又或獻疑焉是以前書不敢不逡巡牢讓亦有以發閣下之雄辨使矚然為世程者今月某日函使至果貽理言大明時人之所以失而我獨障頽波而逢其原既一辭不獲命又學淺不堪徃復敢不敬從前史稱以大將軍而有揖客豈不為重循汲直之言則有以略其禮而增高者今鄙人之不讓

適有以增閣下之重耳實白

答饒州元使君書

傳使至蒙致書一函辱示政事與治兵之要明禮以
及用通經以知權視陰陽慘舒之節取震虢澤濡之
象知天而不泥於神怪知人而不遺於委瑣先鄉社
之治以決于舉郡首隊伍之法以及于成師猶言數
者起一而至萬操律者本黃鍾以極八音誠通人之
說章章必可行者也鄙生涉吏日淺嘗耳剽老成人
之言熟矣今研覈至論淵乎有味非游言架空之徒
喜未嘗不至朴也故揚權所見以累下執事云蓋豐
荒異政繫乎時也夷夏殊法牽乎俗也因時在乎善
相因俗在乎便安不知發敘重輕之道雖歲有順成
猶水旱也不知日用樂成之義雖俗方阜安猶蕩析
也徙木之信必行則民不惑此政之先也置水之清
必勵則人知敬此政之本也銛箏之機或行則姦不
敢欺此政之助也則有以其弛張雄雌唯變所適古
之賢而治者稱謂各異非至當有二也顧遭時不同
耳夫民足則懷安安則自重而畏法乏則思濫濫則
迫利而輕禁故文景之民厚其生為吏者率以仁恕
顯武宣之民亟於役為吏者率以武健稱其寬猛迭

用猶質文循環必稽其弊而矯之是宜審其救奪耳
太史公云身脩者官未嘗亂也然則脩身而不能及
治者有矣未有不自已而能及民者今之號為有志
於治者咸能知民困於杼袖罷於征徭則曰司牧之
道莫先於簡廉奉法而已其或材拘於局促智限於
罷懦不能斟酌盈虛使人不倦以不知事為簡以清
一身為廉以守舊弊為奉法是心清於棖闌之內而
柄移於胥吏之手歲登事簡偷可理也歲札理業則
潰然攜矣故曰身脩而不及理者有矣若執事之言
政詣理切情斥去迂緩簡而通和而毅其脩整非止
乎一身必將及物也其程督非務乎一切必將經遠
也坊民之理甚周而不至皎察字民之方甚裕而不
使侵蟬知革故之有悔審料民之多撓厚發姦之賞
峻欺下之誅調賦之權不關於猾吏逋亡之責不遷
於豐室因有年之利以補敗汰不急之用以嗇財為
邦之要深切著明若此其悉也推是言按是理而篤
行之烏有不及治邪古稱言之必可行非樂垂空文
耳有人民社稷固可踐其言也瀕江之郡饒為大履
番君之故地漸甌越之遺俗餘干翰有畝鍾之地武
林有千章之材其民牟利鬪力狃於輕悍故用暴虐

聞重以山茂櫛苦金豐鐔銑齊民徃徃投鎡鎡而即
鍤鑄損絲泉而工塞擷乘時詭求其息倍稱聞聞主
分土者盡籠其利而幹之坐簿書舛錯為中執法所
効事下三府以受賕論其刑甚渥于今列郡不寒而
慄彼邦人聆其風聲固曰彼浚民者上罪之若此其
念民也至矣今二千石以前失職非其罪執事者即
人心而用之彼邦人是必翹然須其至而安矣以思
治之民遇習治之守欲不至於富庶得乎昌黎韓宣
英好實蹈中之士也前為司封郎以餘刃剗劇于計
曹統無通事能承其家法而紹明之庭堅仲容之族
也坐事為彼郡司馬更聞餘者再焉是必能知風俗
之良窳采察之善否盍嘗問焉足為群疑之寶龜也
至於否臧文律戢玩之戒均權以制動函隸以稔勇
平居使不墮萃聚使不譁坐作疾徐心和氣振誠纖
悉於所示也故置之以須執事異日承進律之命握
獸符而駕寅車然後貢其瞽言重曉左右耳

答容州竇中丞書

健步劉子良至猥奉書教以愚為希儒之徒重言一
發華衮非貴世之服儒衣冠道古語居學官者為不
鮮矣求其知所以然者幾何人借曰有之未必不詬

病耳今夫挾弓注矢遡空而發者人自以為皆羿可
矣移之於澤宮則噤而不敢言何哉有的不可欺故
也今夫儒者函矢相攻蝸蟾相喧不啻於穀弓射空
矢者孰為其的哉異日兄道大行則言益重使儒者
之的懸於舌端不得讓也由是知辱教之喜可勝既
乎間承得一二易生列侍絳帳荒服之外持經鼎來
爭捐珠璣以易編簡不疾而速其君子之德風與而
裔憬俗已丕變矣顧其風候非民和可移地泄恒燠
冬無嚴氣其在嗇神以佐藥兼味以禦稜所謂養賢
以及萬民頌之時義不可不順苟以有待及物為心
則養已與養民非二道也矧群情之顯顯乎禹錫再
拜

荅柳子厚書

禹錫白零陵守以函置足下書爰來眉末三幅小章
書僅千言申申疊疊茂勉甚悉相思之苦懷膠結贅
聚至是泮然以銷所不如晤言者無幾書竟獲新文
二篇且戲余曰將子為巨衡以揣其鈞石銖黍余吟
而繹之顧其詞甚約而味齋然以長氣為幹文為支
跨躒古今鼓行乘空附離不以鑿枘咀嚼不有文字
端而曼苦而腴佶然以生癯然以清余之衡誠懸于

心其揣也如是子之戲余果何如哉夫矢發乎羿發而中微存乎它人子無曰必我之師而能我衡苟然則譽羿者皆羿也可乎索居三歲理言蕪而不治臨書軋軋不具禹錫曰

與柳子厚書

間發書得箏郭師墓志一篇以為其工獨得於天姿使木聲絲聲均其所自出抑折愉繹學者無能如繁休伯之言薛訪車子不能曲盡如此能令鄙夫冲然南望如聞善音如見其師尋文寤事柝驚心得倘佯伊欒又而不能平差夫郭師與不可傳者死矣弦張柱差反楚道枵然貌存中有至音含糊弗聞噫人亡而器存布方冊者是已余之伊欒也豈獨為虢師發邪想足下因僕書重有槩耳不宣禹錫白

荅道州薛侍郎論方書書

禹錫再拜初元出中臺守江華人咸曰函牛之鼎以之烹小鮮惜乎餘地澶漫而無庸也愚獨心有槩焉以為君子受乾陽健行之氣不可以息苟吾位不足以充吾道是宜寄餘術百藝以洩神用其無暇日與得位同又欲以是理求有得於元而未有路會崔生來辱書教果惠以所著奇方十通商古今之宜而去

其并猥以一物足以了病者居多非累試輒效不在是族或取諸屑近亦以攬拾慮怕人多怠忽不省必建言顯白揚其功於已然其它立論率以弭病於將然為先而攻治為後言君臣必以時言宣補必以性言砭火必本其輸榮言被攘必因其風俗齊和之宜炮剔之良暴灸有陰陽之候煎烹有少多之取撓猷反勞以制駛露置以養潔味有所走薰有所歸存諸臧悉易則生患非博極遐覽之士孰能知其所從來哉愚少多病猶省為童兒時夙具襦袴保姆抱之以如醫巫家鍼烙灌餌亘然帝號巫嫗輒陽陽滿志引手直求竟未知何等方何等藥餌及壯見里中兒年齒比者必睨然武健可愛羞已之不如遂從世醫號富於術者借其書伏讀之得小品方於群方為最古又得藥對知本草之所自出考素問識榮衛經絡百骸九竅之相成學切脉以探表候而天機昏淺布指於位不能分累菽之重輕第知息至而已然於藥石不為惜矣爾來垂三十年其術足以自衛或行乎門內疾輒良已家之嬰兒未嘗詣醫門求治者頃因欲編次已試者為一家方書顧力不足今尤能我先所以辱貶之喜信踰拱璧有以賞音適道耳常思世人

居平不讀一方病則委千金於庸夫之手至于甚殆
而曰不幸豈真不幸邪甚者或乘少壯之氣笑人言
醫以為非急昌言曰飽口飽腹藥其如我何所承之
氣有時而既於禱神佞佛遂甘心焉况以愚言覆觀
之其人固比肩耳前蒙示藥焙法謹如教地之慝果
不能傷雖音胡水馮喜速朽者率义居而無害萬
物不可以無法謂生不由養致其誣乎山川匪遐事
使之遠形不接而諭者莫賢乎書臨紙悵悵不宣禹
錫再拜

與刑部韓侍郎書

退之從丞相平戎還以功為第一官然猶議者黷然
如未遷陟此非特用文章學問有以當衆心也乃在
恢廓器度以推賢蓋材為孜孜故人心樂其道行行
必及物故耳前日赦書下郡國有棄過之目以大國
材富而失職者多千鈞之機固省度而釋豈鼯鼠所
宜承當然譬諸蟄蟲坯戶而俯者與夫槁死無以異
矣春雷一振必歆然翹首與生為徒况有吹律者召
東風以薰之其化也益速雷且奮矣其知風之自乎
既得位當行之無忽禹錫再拜

荅連州薛郎中論書儀書

吾兄不知愚無似猥以書見攻其非且曰我與子中外屬當為伯仲其抵我書執禮太卑按舊儀凡兄弟之齒有唯無伏它以是為衰其於匹敵即前云願後云白而已大曆初李贄皇常侍猶守之無渝二公何人也我與子何人也烏有從未俗以姑息為禮而不虞識者所窺邪其旨云爾愚得書退而思惟愀然自賀曰在怕人為宜而在愚為過豈不能幸歟故盡言於兄期有以相暢耳夫禮之文為著定宜尊宜卑猶四方上下左右前後稱謂一立古先聖賢所不敢多管教中不敢當命卿之饗虞人不敢承士之招先禮而後身也汲黯不為大將軍而虧九卿王祥不為錄尚書而屈三公先道而後時也是則非據之榮雖君命有所不受非道之利雖衆尚有所不為尤長於大曆初嘗接前輩游故其風采去承平時不甚相遠愚長於貞元中所與游皆後來諸生然猶於稠人廣坐時聞老成人之說灌注耳目斑斑然不絕如綫其後為御史四方諸侯悉以書來賀校其禮皆駁不同唯洪州牧李常侍異潭州牧楊中丞憑始言執事其它如儀而同在憲司者咸以二牧為不遜愚時與其僚柳宗元昌言於衆曰監察八品也當衣碧言執事

為宜不當經怪衆咸听然而咤復謂愚云子奚不碧其服邪其不堪執事色深不可以言解及謫官十年居僻陋不聞世論所以書相問訊皆昵親密友不容變更而時態高下無從知耳前年祇召抵京師偶故人席夔談因及是事乃知與十年前大殊至有同姓屬尊致書於屬卑而貴者其紙尾言起居新婦夔獨竊笑之而已然猶不敢顯言詆之今有人謂東為西者一言發則凡人嗤為騃且狂苟不衆非之則東西易位又矣尊卑失其儀恬而不怪安得使人如東西不較易之哉曾子有云君子之愛人也以德細民之愛人也以姑息謂古人悉朴且賢則斯言不當發於洙泗間耳蓋三代之尚未嘗無弊由野以至僿豈一日之為漸靡使之然也嫉其弊而救之以歸于中道以俟乎薦紳先生德與位并者揭然建明之斯易也語曰俟自直之箭則百代無一矢俟自圓之木則千歲無一輪執矯揉之器者視之灌叢無非良材耳竊觀今之人於文章無不慕古甚者或失於野於書疏獨陋古而汨於浮二者同出於言而背馳非不能盡如古也蓋為古文者得名聲為今書者無悔吝如水

亦為關

劉賓客文集卷第十

劉賓客文集卷第十一表章一為淮南杜相公佑修凡十首

讓同平章事表一首 謝平章事表一首

謝手詔表詔後敕新州謝貸錢物表

請赴行營表一首 謝兵馬使朱鄭等官表

賀復吳少誠官爵表一首 賀除虔王表一首

慰義陽公主薨表一首 慰王太尉薨表一首

讓同平章事表

臣某言高品吳千金至奉制加臣銀青光祿大夫同中書門下平章事兼徐泗濠等州節度觀察處置等使餘如故者初受恩榮若登霄漢退思塵忝如履春

水臣誠惶誠恐頓首頓首臣聞以德詔官以勞定賞苟或虛授人無勸心臣自守方隅累更時歲荷唐虞宣力之寄乏齊魯報政之能愧無可稱以荅高位豈意聖慈弘獎天澤薦加以燮贊之崇名被庸虛之陋質懼速官謗有玷大猷伏以宰相之職安危是注其在當否繫于慘舒惟以材陞例無平進舉不失德則副蒼生之心苟非其人或致外夷之哂臣雖愚昧嘗覽前言豈敢冒榮遂安竊位輒思事理冀盡芻蕘若以汴河要津漕運所切徐方倣擾師旅未寧謹當上稟敵謀下貞戎律克期而進屈指可平勵衆之先是臣之志旣行其事必在正名所加節制安敢飾讓至於銀青貴服金鉉重名勲績無聞豈宜濫及伏乞賜寢前命俯亮愚衷微臣遂知止之宜聖朝無不稱之服名器斯慎退讓有聞遐邇聆風孰不知勸其新授官告謹重封進無任懇禱屏營之至

謝平章事表

臣某言伏蒙獎拔超踐鈞衡慮玷大猷昧死陳讓再奉嚴旨不令固辭恩厚命輕位高責重中謝臣聞天下安危注意將相處論道具瞻之地當總戎作鎮之權雖協夢而求無聞秉鉞之寄登壇以拜不兼調鼎

之榮授受惟艱伊昔猶爾况臣庸瑣何以克堪陛下
玄造曲成大明私照俾掌戎律復參廟謨寵光之崇
在臣已極毫髮之效於國何施謹當罄竭微誠奉遵
至教伏天威以懾不類敷聖澤以遂群生上分旰食
之憂下塞素餐之責力誠不足心實念茲伏乞皇明
俯賜昭鑒臣恪居官次遐守藩維不獲伏謝彤庭陳
露丹慊心存闕下同犬馬之戀恩身在淮濱仰雲天
而結思無任懇悃屏營之至

謝手詔表

詔後批云朕自書

臣某言中使閻忠信至奉宣聖旨存問兼賜臣手詔

拜捧紫泥跪伸金簡承旨見聖神之略感恩知身命
之輕中謝臣素乏異能幸逢昌運猥當旄鉞之寄未

靖祆氛榮分台鼎之名何階啓沃竊位斯久速尤是
虞豈謂玄化曲成鴻私荐及特紆睿思親灑仙毫降
自九重粲然五色初喜麗天之象遠燭輝光旋驚垂
露之蹤曲覃霈澤鸞鳳騫翔而變態煙雲舒卷以呈
姿賦彩飛文聳神蕩目恭惟國寶何幸家藏感極涕
零莫知上荅應緣軍旅庶務謹具別狀奏聞無任欣
戴屏營之至

謝貸錢物表

臣某言中使南宮懷珍至奉宣聖旨存問兼賜臣墨
詔天光下濟叡澤曲流銜恩未酬居寵彌懼

中謝臣

受任斯極微功莫施昨以封略未寧干戈猶動壽春
固壘以備盜淮甸興師以扞姦經費所資數盈鉅萬
餽餉時久供億力殫慮始圖終不敢緘默輒陳管見
上黷宸聰伏蒙聖慈特遂誠請遠承如綍之旨特假
聚人之財軍須不愆士氣彌振糗糧既備永無半菽
之虞襦袴足頒遠超挾纊之感是為說使咸願先登
臣忝總戎倍百欣荷伏以上分國用俯濟軍興候清

煙塵謹備償納

請赴行營表

臣某言臣自守淮濱已周星紀虔奉朝典粗安遐方
素效未聞新恩荐及身曳兩綬寄深一隅蚊蚋負山
力誠不足鷹鷂逐鳥志則有餘臣再授兵符夙參軍
幕被堅執銳雖未經於戎行制勝伐謀亦嘗習於事
業自忝藩翰屬時清平無施汗馬之勞但詠橐弓之
什今則幸遇殊獎委之專征以身率先是臣素志况
聞徐州士衆本無叛心倉卒之間危疑至此臣請自
臨疆場親領紀綱裂帛繫書諭其禍福椎牛饗士養
以威聲冀宣皇風煦茲蠢類以忠義感脇從之伍以

含弘安反側之徒革面悅心期乎不日其揚州留務請令行軍司馬路應權知伏乞聖慈俯賜昭鑒

謝兵馬使朱鄭等官表

初除侍御史續除中丞異姓王

臣某言奏事官常溫特蒙聖恩重賜朱鄭等官告宸象昭回煥然下燭榮分右職光賁遐藩中謝臣伏以朱鄭朴忠為心沈毅見色當建封禦侮之寄見張愔提孩之年昨者隸職徐州分鎮斬縣繹騷之際梗亮彌彰歷險而來寔繁其旅詳探本末有足褒稱輒具奏聞恐湏獎勸伏蒙睿鑒俯亮微誠優詔先行已階直指之列殊私荐至超陞獨坐之崇戶領三千爵踰五等恩生非次感異常倫轅門有光武旅增氣遂使感激之士希勇爵以捐軀猖狂之徒聆聖澤而悅性風行草偃其勢必然臣忝總戎麾倍百欣荷

賀復吳少誠官爵表

臣某言中使宋惟澄至奉宣聖旨存問兼賜臣墨詔及昭示洗雪吳少誠等事天地弘覆燾之恩雷雨施渙汗之澤瑕累咸滌危疑獲安中謝臣伏以少誠擅興兵戈事生詿誤自王師致討天威下臨曾無悖辭亟聞引咎初懷疑懼雖擁衆以偷生旋感聖神屢拜章而請命陛下仁深解網慮軫納隍念餽餉飛輓之

勤閔戰爭暴露之苦舉茲宥過之典副彼效順之誠
一方承再造之恩九有覩惟新之化敷鴻霈而覃及
蠢類鼓仁風而臻于大和罷析銷鋒自茲而始臣謬
膺重寄虔守遐藩不獲稱慶瑤墀陳露丹懇仰瞻宸
極倍百常情無任慶抃屏營之至

賀徐虔王等表

臣某言中使李國真至奉宣聖旨存問兼賜臣墨詔
鴻澤浹下大明燭幽曉諭便藩慰安稠疊中謝臣伏
覩天書恭承睿旨弘愛人屈已之道酌因時適變之
宜擇賢王作鎮徐方俾張愔便主留務上則成邦家
盤石之固下則副士衆拜章之請戚藩之寄斯重舊
勲之祀獲全丕變猖狂之徒咸躋仁壽之域既弘在
宥坐見止戈率土人臣孰不欣說臣素乏方略謬荷
寵光猥塵將相之名無施分寸之績遭逢若此報效
蔑聞官諉已興渥刑宜及陛下恩深覆載道務含弘
恤公私餽餉之勤念吏士鋒鏑之苦特紆神筭昭發
德音危疑獲安制置惟固好生宥過誠陛下開網之
仁尸位無功重徵臣素餐之責周章跼蹐胡顏自安
但以遐守藩條恪居官次不獲仰謝雲陛陳露血誠
未遂周任知止之言敢逃臧文竊位之咎無任戰越

之至

慰義陽公主薨表

臣某言伏承義陽公主薨伏惟聖懷傷悼增切伏以公主妍姿令則冠絕天人稟教皇宮已挺柔嘉之德降嬪卿族益彰貞粹之儀方期作範壺闈長榮邸第豈意遘茲短曆奄謝昌辰伏慮陛下軫念未捐深慈莫遣有虧常膳罷設宮懸臣子之情不任惕戀况聖凡禮異邦家制殊伏願道齊彭殤理達修短割肌膚之愛慰寰海之心率土人臣孰不相慰無任懇悃屏營之至

慰王太尉薨表

臣某言伏承成德軍節度使太尉兼中書令王武俊今日某日薨沒伏以武俊生逢昌時天授忠節奮揚義勇茂建勳庸秩冠朝端參燮和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期鼎臣云亡梁木斯壞伏惟陛下君臣義重存沒感深臨冊祔以興懷聽鼓鼙而軫念臣恪居官守奉慰無階悲慟之誠有加常品謹遣某官某乙奉表陳慰以聞

劉賓客文集卷第十一

劉賓客文集卷第十二 表章二為淮南杜相公佑修凡十一首

謝冬衣表一首

謝濠泗兩州割屬淮南表一首

謝曆日面脂口脂表一首

謝墨詔表一首 論廢楚州營田表一首

請朝覲表一首 謝春衣表一首

謝賜門戟表一首 謝男師損等官表一首

謝端午日賜物表一首 謝墨詔表一首

謝冬衣表

臣某言中使王國清至伏奉聖旨慰勞臣及將佐官

中山集 卷三
吏僧道耆壽百姓等并賜臣墨詔及冬衣兩副大將
衣四副者大明昭回遠燭下土殊錫稠疊延及偏裨
慶抃失圖捧戴相賀 云 臣謬承委寄獲守藩條灰
琯屢移塵露無補陛下至仁天覆玄化風薰頒以兼
衣賁茲瑣質降自天府光于轅門絨膝既開覩綵章
之盛飾蹈舞而服發溫燠於祁寒愧塵補衮之名更
荷解衣之賜恩波下浹將校同霑共戴殊榮咸思竭
節生成是荷雨露難酬無任懇悃慙荷之至

謝濠泗兩州割屬淮南表

臣某言伏奉十一月二十九日詔書其濠泗兩州令
臣依前收管臣謬承寵光作鎮淮海位均九伯權總
十連內省無堪常恐不逮豈謂恩私曲被封略有加
慙無報政之勤重受分憂之寄伏以兵戈方息閭里
未安謹當奉宣皇風慰彼黔首且責成於牧宰期不
失於澄清伏惟聖明俯賜昭鑒無任感戴屏營之至

謝曆日面脂口脂表

臣某言中使霍子璘至奉宣聖旨存問臣及將佐官
吏僧道耆壽百姓等兼賜臣墨詔及貞元十七年新
曆一軸臘日面脂口脂紅雪紫雪并金花銀合二合
稜合二皇明遠燭殊錫存臻抃舞失容捧戴無措伏

惟皇帝陛下立極御人順時布政禮崇大蜡澤浹遐
藩臣叨榮日深竊位時久謬回宸眷猥降玉人天書
下臨覩三光之照耀玉曆爰授知四氣之環周雕奩
既開珍藥斯見膏凝雪瑩含液騰芳頓光蒲柳之容
永去癘疢之患命輕恩重上荅何階無任感抃屏營
之至

謝墨詔表

臣某言中使陳日華至奉宣聖旨存問兼賜臣墨詔
又以臣所奏羅珣及裴靖政理有方今各賜手詔激
賞者恩降重霄澤流下土義存獎勸榮冠等夷臣昨
以羅珣裴靖勵精吏理效用著明人咸說安俗致殷
阜恐須甄錄以勸在官輒獻封章具陳成績伏蒙睿
鑒俯亮愚衷載嘉理行之尤光示絲綸之旨守道者
益以固志懷慝者由是悛心激俗化人於茲為大臣
謬司廉問職在澄清幸遇旌善之時獲免蔽賢之責
無任欣感之至

論廢楚州營田表

臣某言中使曹進玉至奉宣聖旨存問兼賜臣墨詔
以楚州營田廢置事令臣商量奏來者跪奉天書恭
承睿旨道存致用義在隨時云云伏以本置營田是

求足食今則徒有糜費鮮逢順成刈穫所收無裨於國用種糧每闕常假於供司較其利害宜廢已久比來循守舊制不敢輕有上陳皇明鑒微特革斯弊取其田蓄授彼黎蒸仍俾薄租誠為至當但以田數雖廣地力各殊須量沃瘠用立程度臣已追里正臣與商量利便謹具別狀奏聞伏惟聖慮俯賜詳擇無任震越屏營之至

請朝覲表

臣某言臣聞臣之事君有犯無隱懇誠所至敢不罄陳伏惟聖明俯賜矜察

云

臣代受國恩忝承門蔭

脫巾筮仕敢期榮名陳力效官靡樹聲績始因孤直驟歷清班復加朝獎作藩外府遠違輦下十有四年恪守淮濱逮今一紀犬馬懷戀寢興匪遑蒲柳易衰遲莫俄及竊位時久妨賢愧深况歷官已來四十八考祇奉朝謁時纔二周服勤郡符荏苒垂老屏營魏關之思夢想承明之游如迫餒寒不忘衣食伏惟睿鑒俯亮愚衷蚤賜擇人與臣交代授受之際冀無可虞然後脂車奔赴京輦微願斯畢雖死猶生臣頃以戎務方殷猥加宰輔今既事罷實慙此名為有藩鎮同時未敢輕上印綬伏以聖朝赫赫左右惟賢漢愧

得人周慙多士臣才略既短齒髮又衰柄用之地甘心自絕所冀退歸舊里沐浴皇風絕鍾鳴漏盡之譏展維桑與梓之敬匪惟名器不假實貴骸骨可全知止之心神祇所鑒無任懇悃怔營之至

謝春衣表

臣某言中使陳日華至伏奉聖旨慰勞臣及將佐官吏僧道耆壽百姓等并賜臣墨詔及春衣兩副大將衣四副王人捧詔御府降衣寵光不隔於遐藩慶賜猥霑於裨將臣素乏器能謬膺驅使每慙效薄常懼食浮陛下覃以至仁均其厚施宰元和而布澤順時律以頒衣出自禁中賁于臣下執領禮而抃舞失次被纖柔而顧眄增輝舉體動容既安且吉在身不稱恐招鷄翼之譏居位無功叨受鶴紋之賜下延將校同荷生成

謝賜門戟表

臣某言臣得進奏官裴邁狀報今月九日軍器使梁延壽奉宣進止付所司准省牒賜臣門戟十二竿者恩降雲天榮加門戶承旨慶抃省躬慙惶伏以禮著等威朝有命數是昭懋賞必在疇庸臣謬荷寵光素無績效旌旄之寄已忝外藩祭戟爰列更光私第賁

于棖闡慶及子孫覩茲盛儀實愧虛受無任欣戴屏營之至

謝男師損等官表

伏見今月一日制授臣長男師損祕書省著作郎次男式方太常寺主簿又得進奏官裴邁狀報伏承聖恩特降中使送官告到臣宅分付師損者寵渥非常授任不次驚躍無措靦懼失容云臣謬分重寄獲守外藩受恩既深無績可紀男師損等器惟凡品教關義方蚤沐叡慈已階官次每懷塵忝常誠滿盈豈謂鴻霈曲覃大明私照寬臣尸素之責念臣葵藿之

誠下延胤息叨踐班級天書出禁中貴臨門榮冠等夷慶流宗族况著作乃論撰之地唯才吏是居太常寔禮樂之司非儒者勿履願茲庸昧忽此超昇內省慙惶若墜冰谷伏以聖朝立制建官惟賢名實無乖輪轅盡適微臣父子獨為幸人非據踰涯自中徂外虛受丘山之賜實增負乘之憂進退彷徨不知所據無任戰汗屏營之至

謝端午日賜物表

臣某言中使劉光弼至奉宣聖旨慰勞臣及將佐官吏僧道耆壽百姓等兼賜臣墨詔并衣一副金花銀

器三事綵絲一軸大將衣四副綵絲五軸寵光薦至
慶賜曲霑抃舞失容捧戴無力伏以朱明仲月端午
佳辰萬國被薰風之和九天垂湛露之澤臣幸逢休
運獲守外藩叨承獻慈猥受榮賚發詔而煥窺宸象
振衣而頓失炎威色絲表祥載光於佩服珍器克玩
盡飾於圓方恩輝既盈喜懼交集下延裨將共荷鴻
私無任感戴之至

謝墨詔表

臣某言中使陳日華至奉宣聖旨慰勞臣及將佐官
吏僧道耆壽百姓等兼賜臣墨詔恩降紫泥澤流下
土跪奉自天之命遙馳捧日之心云伏以皇帝陛下
下凝旒穆清軫念黎獻已洽雍熙之化尚存宵旰之
勤遠降王人特迂宸翰慰安稠疊曉諭便蕃任重力
微不知上荅應緣戎旅庶務謹具別狀奏聞伏乞皇
明俯賜昭鑒無任感戴屏營之至

劉賓客文集卷第十二

劉賓客文集卷第十三 表章三

為杜司徒讓度支等使表

為杜司徒謝追贈表

為杜司徒讓立去思碑表

為李尹賀獻懿二祖表

為京兆常尹賀雨止表

為常尹賀祈晴獲應表

為常尹謝許折糴表

為常尹賀元日祥雪表

為常尹賀春雪表

為京兆李尹賀雨表

為李中丞謝紫雪等表

為李中丞謝鍾馗等表

為杜相公謝鍾馗等表

為武中丞謝新茶表

為武中丞謝春衣表

為武中丞再謝新茶表

為武中丞謝新橘表

為武中丞謝柑子表

為武中丞謝冬衣表

杜司徒讓度支鹽鐵等使表

臣某言伏奉制書授臣檢校司徒同中書門下平章

事充度支及諸道鹽鐵轉運等使者臣久塵高位尸

素已多更受新恩滿盈為懼云伏惟皇帝陛下紹

登寶位光纂鴻猷擢用之間華夷聳聽况利權所在

宜適變通國計是資須明輕重當至化鼎新之日是

微臣遲莫之年將何以上副宸衷下成庶務進退惟

谷冰炭在懷輒罄愚誠冀回天監陳力無補庶遵周

任之言循涯若驚敢飾范宣之讓慙惶跼蹐倍萬常

情謹奉表陳讓以聞

杜司徒謝追贈表

臣某言伏奉制書褒贈臣亡父先臣某官尚書左僕射者時逢霈澤禮極徽章云臣家受國恩至臣累葉常懼不克負荷以忝前人豈意多幸遭逢猥居高位陛下應乾御極作解庇人恩浹寰區禮成宗廟垂仁布德自葉流根紫書忽降於重霄密印榮加於厚夜星霜增感蒸嘗有輝非臣殞越所能上報無任感咽屏營之至

杜司徒讓淮南立去思碑表

臣某言伏見淮南節度使王錡所奏當道將吏僧道

耆壽等請為臣立去思碑伏奉聖旨允其所奏臣內惟菲薄聲績無聞祇荷恩私慙懼交至云臣伏蒙

先朝過獎累典方隅頃鎮江都十有四載數周星紀水旱備經境接淮濱兵戈時起至於邑里粗免流離非臣所能悉稟聖化在唐堯可封之日奚假吏師當漢宣責實之時皆承詔旨王錡與臣交代輒有上聞况以去思為名慙無可紀之績伏以建碑有制甲令垂文苟非至公翻益貽誚臣伏覽故事宋璟自廣州都督入為尚書南海之人請為刊石璟自遜讓至于再三雖勒其文竟從降制著在國史垂為美談璟非

苟榮人益見德臣才誠不逮心實慕之伏乞聖慈賜
寢前命臣情非飾讓義在徇公云云

京兆李尹賀遷獻懿二祖表實

臣某言伏見詔書以今月某日奉遷獻祖懿祖神主
祔于德明興聖皇帝廟盛禮云畢宗祧永安云云伏
以太祖景皇帝膺期撫運啓封于唐為百代不遷之
宗開三靈眷命之兆頃以本朝初建清廟備儀二祖
冠西室之先景皇闕東向之位諸儒獻議歷載未行
陛下濬發獻謨旁延正論爰詔多士會於中臺酌三
禮之前文參百王之故事講貫斯定詢謀僉同撰日
展儀考祥視履配貴神於遠祖正尊位於始封廟貌
有嚴禘嘗允穆示人以孝得禮之中既觀秩秩之容
必降穰穰之福臣職居內史屬忝本枝躬導盛儀獲
申誠敬無任感說屏營之至

京兆常尹賀雨止表夏卿

臣某言今月某日中使吳文政奉宣聖旨緣今年雨
多恐傷苗稼諸有靈跡處並宜祈禱者臣謹檢尋祀
典方議徧祠惟德動天倏已澄霽伏以至教惠農兆
人務本今歲宿麥茂於常年爰自季春遂逢多雨蓋
陰陽常數有以推遷而隴畝之間未聞傷敗陛下勞

謙思切覆育恩深或慮成災先期軫念昭薦未陳於
方社獻誠已格於上玄文明煥開陰曠潛掃有年之
慶實兆於茲辰先天不違夔超於前代臣謬司京邑
虔撫蒸黎欣抃之誠倍百群品無任踴躍屏營之至

京兆常尹賀祈晴獲應表

臣某言今月十七日中使某奉宣聖旨以霖雨未晴
諸有靈跡處並令祈禱者臣當時於興聖寺竹林神
親自祈祝兼差官城外分路徧祠伏以神祇效靈景
物澄霽兆庶覩動天之德大田俟多稼之期臣謬荷
恩輝忝司京邑抃說之至實倍常情

京兆常尹謝許折糴表

臣某言伏奉詔旨以臣所請畿內折糴宜令度支計
會定數奏來者天慈廣被人瘼是求臣自理京邑不
先威刑唯務便安所期富庶每因賜對常奉德音府
縣之間巨細令奏伏以聖明在上風雨應時順成之
年穀糴常賤若無輕重之法必利兼并之家輒敢上
聞請行折糴天光下燭人隱無遺宣付所司允臣所
奏事關理本惠及生靈臣忝尹京倍百欣荷無任歡
躍屏營之至

京兆常尹賀元日祥雪表

臣某言伏以去冬已來久無雨雪臣每於內殿親奉
德音以宿麥未滋為虞以兆人生疾為念聖情所屬
神理潛通獻歲發春佳雪肇降當夷夏會同之日觀
天人合應之徵迎喜氣於三元浹歡心於萬國癘疵
永息豐阜可期臣以疾疹未平步趨有阻伏蒙恩貸
已具奏聞謹於光宅寺中管當本務不獲隨例稱慶
明庭既覩嘉祥益彰聖德無任欣躍屏營之至

京兆韋尹賀春雪表

臣某言伏奉詔旨充某郡主禮命使謝恩之日親承
德音以春初已來雨雪猶少慮妨農事有軫睿慈今
當下嫁之辰克致上玄之感雲生河漢及佳期而降
祥雪滿寰區應豐年而呈瑞臣官當撫字職在肅雍
慶抃之誠實倍常品

京兆李尹賀雨表

臣某言伏奉進旨以時雨愆候有妨耕農應諸有靈
跡處並令祈請者德音才發膏雨驟飛滂霈已周動
植咸說云伏以久愆時澤上軫聖慈爰命禱祈俾
申誠敬神應如響天且不違未與雲漢之詩已致桑
林之雨臣謬司京邑虔撫黎蒸覩豐年之可期同比
屋而稱慶無任欣抃之至

李中丞謝賜紫雪面脂等表 汶

臣某言中使某乙至奉宣聖旨賜臣紫雪紅雪面脂口脂各一合漂豆一袋特降王人俯臨私第銜恩慶抃省已慙惶 云 臣謬荷寵私素無績效空變星霜之候猥霑慶賜之恩跪捧雕奩榮觀珍藥功能去疾永絕於癘疵澤可飾容頓光於蒲柳生成是荷雨露難酬無任感戴

李中丞謝鍾馗曆日表

臣某言中使某乙至奉宣聖旨賜臣畫鍾馗一新曆日 一軸恩降雲霄光生里巷雖當歲莫如煦陽和云 伏以將慶新年聿循故事績其神象表去癘之方頒以曆書敬授時之始微臣何幸天意不遺無任感戴屏營之至

杜相公謝鍾馗曆日表

臣某言高品某乙至奉宣聖旨賜臣鍾馗一新曆日一軸星紀方回雖逢歲盡恩輝忽降已覺春來 云 伏以圖寫威神驅徐辟癘頒行肆曆敬授四時施張有嚴既增門戶之貴動用協吉常為掌握之珍瞻仰披尋皆知聖澤無任欣戴之至貞元二十一年十二月日

武中丞謝新茶表 元衡

臣某言中使竇國安奉宣聖旨賜臣新茶一斤猥降
王人光臨私室恭承慶賜跪啓緘封云伏以方隅
入貢採擷至珍自遠爰來以新為貴捧而觀妙飲以
滌煩顧蘭露而慙芳豈栢漿而齊味既榮凡口倍切
丹心無任歡躍感恩之至貞元二十年三月日

武中丞謝春衣表

臣某言中使某乙奉宣聖旨賜臣春衣一副王人臨
第御府降衣抃舞失容捧戴無措云伏以律當春
莫慶洽時邕萬物被薰風之和九天垂湛靈之澤臣

受任非次速尤是虞方懷匪服之憂更荷解衣之賜
恩加畫飾拖朱紫而為榮受非以庸顧形影而增愧
丹誠徒罄玄造難酬無任踴躍屏營之至

武中丞再謝新茶表

臣某言中使某乙奉宣聖旨賜臣新茶一斤猥沐深
恩再霑殊錫承旨慶抃省躬慙惶伏以貢自外方珍
殊衆品效參藥石芳越椒蘭出自僊厨俯頒私室義
同推食空荷於曲成責在素餐實慙於虛受

武中丞謝新橘表

臣某言中使某乙至奉宣聖旨賜臣新橘若干顆特

降恩光猥頒慶賜珍踰百果榮比兼金伏以丹實初
成苞貢爰至芬馨味重方列於御筵雨露恩深忽霑
於賤品感同推食事等絕甘豈唯適口為珍實冀捐
軀上荅

武中丞謝柑子表

臣某言中使某乙至奉宣聖旨賜臣柑子若干顆特
降殊私再頒名果自遠稱貴以新為榮伏以方貢外
來人間未覩黃苞輝穎彫俎增華芬芳初佐於大庖
慶賜遂沾于凡口甘踰苹實剖食既同于楚謠寒比
柘漿析醒何慙于漢史感恩思效倍百常情

武中丞謝冬衣表

臣某言中使某乙至奉宣聖旨賜臣冬衣一副恩降
重霄榮加陋質承旨慶抃省躬慙惶臣受任已來微
效莫著每更時律慙曠官常豈謂玄造曲成鴻私荐
及念茲戒寒之候錫以禦冬之衣抃舞失容顧眄增
飾鶴紋是錫遠慙晉代之賢鵜翼不濡實懼曹風之
刺無任感戴屏營之至

劉賓客文集卷第十三

劉賓客文集卷第十四

表章四

牋附

為竇中丞謝上表

謝中使送上表

賀收蔡州表

賀赦表

賀赦牋

賀雪鎮州表

賀平淄青表

夔州謝上表

賀冊皇太子表

慰國哀表

賀龍飛表

賀皇太子牋

賀赦表

賀冊太皇太后表

賀冊皇太后表

和州謝上表

賀改元赦表

夔州論利害表二首

為容州賓中丞謝上表

羣時在朗州相逢因以見託

臣某言伏奉某月日制書授臣容州刺史兼御史中丞充本管經略招討等使臣發開州日已差某官某乙奉表陳謝伏以道途遐阻水陸縈紆臣以今月某日到本任上訖謹宣聖旨慰諭遠人臣本書生素無吏術頃因多幸賁自丘園累沐聖慈驟居清貫識昧通變動乖事宜愧無善狀以塞公責伏惟獻聖文武皇帝陛下凝旒穆清洞照寰海推共理之義分寄股肱念蒸人之勤溥霑遐邇察臣前任事實恕臣本性朴愚賜以恩輝拔於廢棄遠辭偏郡重委方隅捧卽綬以為榮望闕庭而增戀雖到官之始惠未及人而率下之誠務先克己凡施政教皆稟詔條參以土宜遂其物性可行必守有弊必除使蠻夷生梗之風慕臣子盡忠之道力誠不足心實在茲伏乞聖明俯賜昭鑒無任感戴屏營之至元和八年云云

謝中使送上表

臣某言中使吐突仕曉至奉宣聖旨慰諭并送臣至本任者深山遠郡忽降王人跪受恩榮仰瞻宸極伏以發自巴峽至于南荒涉水陸湍險之途當炎夏鬱蒸之候山川縈轉晨夜奔馳幸無它疾得至本管九

重結戀遙傾捧日之心萬里獲安皆荷自天之祐無
任感戴屏營之至

賀收蔡州表

臣某言伏見詔書以唐州節度使李愬生擒逆賊吳
元濟獻俘文武百寮於興安門列班稱賀者天威遠
被元惡就誅一方既平萬國咸慶伏惟睿聖文武皇
帝陛下德超遂古道合上玄臨御已來天人協贊削
平吳蜀掃蕩塞垣車書大同夷狄來貢蕞爾元濟敢
懷野心輒聚犬羊苟偷時月陛下聖謨獨運睿感潛
通天助神兵人生勇氣旣擒兇逆遂正刑書伏三紀
之逋誅成九衢之壯觀宗社昭告華夷式瞻行弔代
而在禮無違烜威聲而何城不克楚氛改色淮水安
流漢上疲人盡霑雨露汝南遺老重覩昇平凡在具
臣孰不欣抃臣久辭朝列恭守遐藩不獲稱慶闕庭
陳露丹慊仰瞻宸極倍萬群情無任踴躍慶快之至
元和十二年十二月二十三日

賀赦表

臣某言伏奉今月一日制書大赦天下者聖德廣運
浹于華夷天光下臨照彼幽蟄伏惟睿聖文武皇帝
陛下神扶寶祚天贊鴻猷意有所之事無不克當淮

右凱旋之後是域中慶幸之時順陽和以發生施霈
澤於寰海網開三面危疑者許以自新耳達四聰瑕
累者期於錄用求碩畫於庶位慮遺材於放臣旌忠
烈之家賞勲庸之胤仁及枯骨無隔於寇戎榮加顯
親普霑於存沒恤刑已責實廩蠲徭頒錫彰有容之
詩崇儒協宗子之望岳瀆咸秩耆艾飲和大僚承任
予之恩武旅荷賜金之寵斯皆禹湯文武之遺美高
祖太宗之耿光集于聖朝然後大備德音所至和氣
隨之歡謔上徹於九天福祚永延於億載能使遠夷
出鄰豈惟小醜革心率土人臣不勝大慶臣久辭關
下恪守海隅犬馬之誠倍百常品無任抃躍屏營之
至

賀赦牋

使持節連州諸軍事守連州刺史劉某惶恐叩頭伏
見今月一日制書大赦天下者伏以獻歲布和皇恩
遠降乾坤交泰寰海廓清伏惟皇太子殿下道冠元
良德兼忠孝承顏拜慶榮耀古今某職守有限不獲
隨例稱賀宮庭無任欣說之至元和十三年正月二
十九日

賀雪鎮州表

臣某言伏見四月二十七日德音以王承宗效順著明復其官爵所獻二郡別置藩垣聖德動天鴻恩及物瑕累咸滌蒸黎永安伏惟獻聖文武皇帝陛下自承寶位克振皇綱既以四海為家每念一夫不獲昨因大慶爰降殊私廣宥過之科開自新之路綸言一發神聖潛通遂令迷誤之徒頓釋憂危之慮命胤子以入侍獻名都以效誠臣心既明天網為解因析四郡別為一方惟懷永圖盡去前弊大河以北化為禮樂之鄉率土之濱重見昇平之日臣恪居官次遐守嶺隅不獲稱慶闕庭無任踴躍屏營之至

賀平淄青表

臣某言伏見制旨魏博節度使所奏逆賊李師道并男二人並梟斬訖以二月十六日御宣政殿受賀者聖德玄運兵威神速旬月之內鯨鯢就誅秦嶽既寧登封有日伏惟獻聖文武皇帝陛下有征必克舉意無違天地協神筭之期雷霆助成師之氣蠢爾孽豎敢生野心蕭斧一臨妖氛自滅皆由聖慈廣被獻略潛通獻俘者盡許生還得地者復令安堵感我仁化激其深秉凡是脅從盡思效節五紀巢穴一朝蕩夷遂使齊魯之鄉復歸仁壽之域捷書既至傳首繼來

備文物於明庭告殊勲於清廟百辟陳賀萬方會同
從此止戈所以為武西周士庶方觀飲至之容東嶽
煙雲已望告成之禮臣恪居遠服嘗忝班行慶快之
誠倍萬群品無任踊躍屏營之至元和十四年三月
二十四日

夔州謝上表

臣某言伏奉某月日制書授臣使持節都督夔州諸
軍事守夔州刺史跪受天詔神魂震驚伏惟文武孝
德皇帝陛下垂衣穆清叡鑑旁達三統交泰百神降
祥決于華夷盡致仁壽臣家本儒素業在藝文貞元

年中三忝科第德宗皇帝記其姓名知無黨援擢為
御史在臺三載例遷省官權臣奏用分判錢穀竟坐
連累貶在遐藩先朝追還方念淹滯又遭讒嫉出牧
遠州家禍所鍾沈伏草土禮經有制羸疾僅存甘於
畎畝以樂皇化伏遇陛下大明御宇照燭無私念以
殘生舉其彝典獲居善部伏感天慈臣即以今月二
日到任上訖碇水千里巴山萬重空懷向日之心未
有朝天之路無任感恩戀闕之至長慶二年正月五
日

賀冊皇太子表

臣某言伏見制書以十二月二十日冊皇太子盛禮
斯畢德音遐宣萬國以貞庶類咸說伏惟文武孝德
皇帝陛下體元立極垂訓御時既闡王猷思安國本
前星位定拱宸極以昭彰蒼震氣宣與天地而長久
禮光七鬯澤被華夷宗祏有無疆之休生靈懷莫大
之慶臣恪居官次遐守巴南不獲稱賀闕庭無任踴
躍屏營之至長慶三年正月日

慰國哀表

臣某言上天降禍大行皇帝奄棄萬國奉諱號擗糜
潰五情伏惟皇帝陛下孝思至性攀號罔極臣恭守
所部不獲陪位西宮伏增感慕之至謹奉表陳慰以
聞長慶四年二月日

賀龍飛表

臣某言伏見詔書正月二十六日皇帝陛下嗣登寶
位萬國同歡日月繼明乾坤交泰伏惟皇帝陛下欽
承顧命惟懷永圖以大孝奉宗祧以至仁蘇品物洞
照寰海統和神人聖祚延長從今無極群生鼓舞自
此太寧臣守遐藩恪居官次不獲奔馳拜舞稱賀闕
庭無任抃躍屏營之至長慶四年二月日

賀皇太子踐

使持節都督夔州刺史劉某叩頭伏惟皇太子殿下
祗膺詔冊光啓儲闈展至性於三朝承本枝於百代
宗祏永固神人以和四嶽仰維嵩之高百川承少海
之潤某限以職守不獲隨例稱慶宮庭無任抃躍之
至

賀赦表

臣某言伏見今月三日制書大赦天下者大明初昇
萬物咸覩渙汗一發神人以和伏惟皇帝陛下天資
睿聖神啓昌期端拱受萬國之朝承顏奉兩宮之慶
初嗣大位克揚孝心三光協明和氣來應臣伏讀赦

令首於奉園陵盡誠敬親九族蘇兆人次及定章程
止進獻已逋責滌夙瑕內照于九重則歸嬪嬙放鷹
犬外明于四目則求隱士開直聲柔遠以仁則還其
係虜賞延以禮則澤及後昆菲食遵夏禹之規弋綈
法漢文之儉墜典咸舉舊章再明昇平之期正在今
日發號之始疾於春風殊私所及霈若時雨臣幸逢
昌運歷事五朝出守遐藩僅垂二紀欣承霑雨作解
之澤不勝犬馬戀主之誠瞻望帝鄉無任屏營懇悃
之至長慶四年三月二十七日

賀冊太皇太后表

臣某言伏見制書以二月十八日冊立太皇太后徽
章克備慶賜遠行榮冠古今澤周寰海伏惟皇帝陛
下續承列聖歡奉兩宮大皇太后含飴保和重光疊
慶漢儀盛於長信周祚興於大任方之聖朝彼有慙
德臣遠守巴峽不獲稱賀闕庭無任抃躍屏營之至
長慶四年三月日

賀冊皇太后表

臣某言伏見制書以二月二十五日冊立皇太后盛
禮畢陳德音遠被一人有慶萬國同歡伏惟皇太后
稟靈作合誕聖表祥徽號極域中之尊慈仁為天下
之母陛下君臨有國子道無違長樂宮中永獻南山
之壽濯龍門上再揚東漢之風率土臣子不勝歡抃
臣遠守荒服不獲稱慶闕庭無任踴躍屏營之至

和州謝上表

臣某言伏奉制書授臣使持節和州諸軍事守和州
刺史臣自理巴賔不聞善最恩私忽降慶抃失容伏
惟皇帝陛下丕承寶祚光闡鴻猷有漢武天人之姿
稟周成叡哲之德發言合古舉意通神委用得人動
植咸說理平之速從古無倫微臣何幸獲覩昌運臣
業在詞學蚤歲策名德宗尚文擢為御史出入中外

歷事五朝累承恩光三換符竹在分憂之寄祿秩非輕而素蓄所長效用無日臣聞一物失所前王軫懷今逢聖朝豈患無位臣即以今月二十六日到所任上訖伏以地在江淮俗參吳楚災旱之後綏撫誠難謹當奉宣皇恩慰彼黎庶久於其道冀使知方伏乞聖慈俯賜昭鑒臣遠守藩服不獲拜舞闕庭無任懇悃屏營之至謹差當州軍事衙官章興奉表陳謝以聞長慶四年十月二十六日

賀改元赦表

臣某言伏見今月七日制書大赦天下者帝遊出震

聖澤如春神人以和天地交泰伏惟皇帝陛下丕承鴻業光闡叡圖吉日展嚴配之儀告天陳太平之盛九廟成禮百神降祥鑿輅旋衡風雲改色殊私廣被再弘莫大之恩寶曆惟新更啓無彊之祚兩宮承慶四海永寧率土臣子上千萬壽臣恪居官次不獲稱賀闕庭無任屏營之至謹差當州軍事衙官試慈州吉昌府別將徐倫奉表陳賀以聞寶曆元年二月十六日

夔州論利害表

臣某言伏準元和十二年四月十八日敕諸州刺史

如有利害可言者不限時節任自上表聞奏者臣伏見貞觀中詔許群臣各上書言利便馬周時一布衣遂因中郎將常何獻策二十餘事太宗深竒之盡行其言擢周為御史至龍朔中壁州刺史鄧弘慶進平索看精四字堪為酒令高宗嘉之亦行其言遷弘慶為朗州刺史則知苟有所見雖布衣之賤遠守之微亦可施用况臣蚤受國恩德宗廟忝為御史逮今歷事四朝頻領藩條當陛下至明之時是微臣竭節之日伏以守在遐郡不敢廣有所陳謹準敕上利害及當州公務各具別狀以聞伏乞聖慈俯賜昭鑒無任感激屏營之至謹差當州軍事衙官守易州安義府別將員外置同正員雲騎尉馮隨謹奉表以聞長慶三年十一月七日

論利害表

臣某言伏準今年正月五日德音宜令諸道觀察使刺史各具當處利害附驛以聞者伏惟皇帝陛下睿哲自天續成列聖善述先志發揚德音率土人臣不勝慶幸臣虔奉詔旨宣示蒸黎伏以華夏不同土宜各異詳求利病謹具奏聞伏乞聖慈俯賜昭鑒臣伏覽國史竊見開元十八年朝集使至京玄宗臨軒親

問利害時宣州刺史裴耀卿上便宜事論轉輸甚詳
竟不行下至二十一年耀卿為京兆尹再以前事奏
論方見允納比及三年漕運七百萬石省脚三十餘
萬貫當耀卿前見不納必有人非之及後數年方展
其效臣僻守遠郡敢望言行祇奉詔書或冀萬一伏
惟明主擇之無任懇悃屏營之至長慶四年五月十
四日

劉賓客文集卷第十四